



25 hasil kajian dibentangkan dalam Persidangan Antarabangsa

ICoGOIA

Fakulti Pengurusan Industri (FIM) Universiti Malaysia PAhang (UMP) dengan kerjasama Fakulti Pengurusan Teknologi dan Perniagaan Universiti Tun Hussein Onn Malaysia (UTHM) menganjurkan persidangan antarabangsa *International Conference on Global Optimization and Its Applications* (ICoGOIA) 2015 yang berlangsung di Dewan Tun Fatimah, UMP Kampus Gambang pada 10 Ogos 2015 yang lalu.

Persidangan ini menyaksikan sebanyak 25 kertas kerja dibentangkan membabitkan topik berkaitan Kejuruteraan, Sains Matematik, Aplikasi Komputer, Penyelidikan Operasi dan Sains Pengurusan, Pengurusan Operasi dan Pengurusan Projek.

Menurut Dekan FIM, Dr. Mohd Ridzuan Darun, UMP sebagai tuan rumah bersama dengan pihak UTHM bekerjasama dalam penganjuran ICoGOIA untuk kali yang keempat ini.

Katanya, persidangan ini merupakan platform terbaik dalam usaha mengumpulkan ahli akademik, penyelidik dan pengamal industri berkaitan untuk berkongsi idea serta kepakaran dalam pelbagai bidang.

"Program pada kali ini juga menjemput dua orang tokoh terkenal menyampaikan ucaptama iaitu Dr. Marco Tieman yang merupakan pengasas LBB International dari Netherlands yang juga merupakan agen perundingan dan firma penyelidikan khusus dalam rantaian bekalan makanan dan logistik industri," katanya.

Turut menyampaikan ucaptama ialah profesor di Jabatan Matematik, Sains dan Teknologi di Universiti Malaysia Perlis (UniMAP), Profesor Dr. Ismail Mohd.

Hadir sama Pengurus Persidangan, Profesor Dr. Razman Mat Tahir. Para peserta pula terdiri daripada pensyarah dari UTHM, Universiti Utara Malaysia (UUM), Universiti Teknologi Petronas (UTP) dan Universitas Padjadjaran, Indonesia.

